



麵擔仔

若有佇路邊擔仔抑是店頭食過物件的人，相信攞有一種感覺，就是擔頭若油膩膩，椅桌摸著黏黏滯滯，袂講真焦鬆的，彼生理擔總是人客排規排，坐甲窒窒溼。其實，認真共想起來，並毋是頭家無注重衛生抑是潦草，嘛毋是貧惰，無共擔頭仔洗予清氣，實在是生理好甲無閒通來洗盪。

毋過，我所懷念彼个賣麵擔仔的阿姨，伊煮的麵毋但湯頭真好，而且擔仔予人看著衛生閣清氣，生理嘛算袂穢。是按怎我去外口讀冊恰食頭路，經過十外年了後，閣轉來遮，煞揣無我思思念念的湯頭，食袂著遐爾恰喙的口味。彼个阿姨的麵擔仔到底是徙去佗位咧？

較早若欲去佗位，揣袂著所在，阿媽定講路佇喙裡，較好喙咧、好禮仔共人問，人自然會共你煮到位。真正規懣好好，有心拍石石成穿，我誠懇去問，總算有人知影彼位阿姨這馬蹓佇佗位，就誠熱心報我去揣伊。

拄見面的時，伊毋捌我，毋過，我猶會認得伊生做按怎。我就表明身份，講我是十幾年前，彼个愛食鹹仔麵恰滷卵，閣愛加兩片肉片的囡仔。阿姨雄雄嘛想無。我閣講我捌干焦欲買肉片，你講肉片無咧賣，我就哭轉去叫阮阿母來。這個時陣阿姨才想起來。

阿姨當初因為豬仔著災的關係，就共麵擔仔收起來，改途共人煮囡仔。知影我來的目的了後，答應欲揀一个歇睏日，親身煮伊的手路菜來予我過癮一下。為著欲予同事做伙來食這鄉土味的湯頭，我嘛無惜本，利用附近的擔頭仔假日歇睏，租彼个擔仔位恰家私頭仔來予阿姨出跤手，順繼做布條仔恰割字來恢復當年的情景。

俗語講：「功夫在手，欲食便有。」阿姨的湯頭恰配料，食著猶原有予人溫暖佇心肝內的滋味。所有的同事嘛攞呵咾甲會觸舌，一直要求阿姨就閣來做麵擔仔的生理，予佢會當隨時來交關，食這款古早味。

為著食這個麵擔仔的麵，雖罔開袂少所費，毋過，嘛真正體會著人所講的，價值是袂當用價數來比並的。

作者：蔡連真

☆詞彙學習☆

【油膩膩】iû-leh-leh：油膩膩。形容含油量過多的樣子。

【滯】siûnn：黏滑的。

【焦鬆】ta-sang：乾爽。乾燥清爽，讓人感覺舒服。

【洗盪】sé-tng/sué-tng：洗滌、清洗。

【恰喙】kah-tshui：合胃口。適合自己個人的飲食習慣。

【著災】tiòh-tse：雞鴨等動物感染瘟疫。